

TE HEHEURAA API



EPERERA 1940

TE MAU API NO TE RAAU ORA TE AHURU O TE API

O TE pohe nei o te faufaa ia no te taatoa, ua vaiihoa hia mai te reira i te mau tamarii atoa e to tatou metua matamua. O te hopea ia no te hara, te utu'a no te ofatiraa i te ture. Ua noaa te tahuti i na taata tahuti ore i roto i te ô i Edene na roto i te hara. O te tahuti ore râ o te mana ia ia ora e a muri noa'tu. Area râ, *ua faaterehia te mau mea atoa e te ture*. Ia ora i te ora mure ore, ia haapao-atoa-hia te mau ture no te ora mure ore. *Te mau mea i faaterehia e te ture, ua paruruhia ia e te ture*. Ia hurihia râ te reira mau faatereraa, e mea ê roa te hopea te noaa mai. Area râ, ia ore te mea mure ore ia haapao i te mau ture no te mure ore, e riro ia oia ei mea pohe noa. Te vai nei te ture i te mau vahihiteitei roa e i te mau-vahi haehaa atoa ra. Te titau nei te ora mure ore ia haapaohia te mau ture no te ora mure ore ra.

E hotu mai te mau huero atoa i to ratou huru mau. E faahotu mai te mea tahuti noa i te pohe. I te taime i riro ai to tatou na metua matamua e mea tahuti na roto i te ofatiraa i te ture no to rana tahuti-ore-raa, ua faatae mai rana i te pohe i nia i to rana huaai atoa e i nia atoa ia rana iho. *Mai te taata i hope i te pohe ia Adamu*. Te tairi noa nei â te pohe i te fetii taata atoa. *E mai te taata nei hoi ua haapaohia ia hoê a'e poheraa*. Noa'tu i ta'na mau ravea atoa, eita oia e ere i te reira hopea. Ua oti i te parauhia e, *E pohe iho â oe*, e e tupu iho â te reira. Te tafeta tei noaa mai no nia i te raa o te pohe, tei rahuia to'na maa ra, ua hee ia i nia i te mau ui atoa, e te mau mea atoa e vai nei i te ao nei ua hoê ratou i roto i te hoê vahi, te paruparuraa no te poheraa.

Ia pê te tino nei, o te hopea anei te reira o te oraraa? Aita roa'tu. Ua ite tatou e, te tufaa o te taata tei noaa mai no

ō mai i te ra'ira; e ora noa te reira a ho'i atu ai te tino repo i raro i te repo. Aita â te reira i navai. Te tupu nei te uiraa: Teie tino nei tei riro ei mea pohe na roto i te hara, e vai noa anei oia i raro a'e i te utu'a o te ture i ofatihia ra, e a ore râ, te vai nei anei te hoê ravea no te faaoraraa i te hara, e te faatiaraa ia'na mai te pohe? E haamoehia anei te mau mea atoa tei riro ei tino i roto i te repo ia tanuhia te reira? E moe anei te mau taatiraa here i rotupu i te tane e te vahine e te mau metua i ta ratou mau tamarii? E haamoe-atoa-hia anei teie nei tino faahiahia e te mau ite tei noaa ia'na a ora'i oia i roto i te mau materia o te ao nei?

Te tae mai nei te pahonora na roto i te mau tau i mairi a'enei, mai te hoê pehe himene te haere noa i te rahiraa na roto i te amuiraa mai te mau reo o te mau peropheta e te mau feia mo'a e tae noa'tu e tae to'na puui i roto i te mau aaui atoa. Tei roto i te parau a Isaia te rahiraa o te reira himene, *To oe ra mau taata pohe, e ora ia; to ratou mau tino pohe, e tia faahou ia; a ara, a himene, e tei parahi i te repo e! e au to oe ra hau i te hau o te mau mea rii ra; e haapuai mai hoi te fenua i te feia i pohe ra.* E te na ô atoa maira te reo o Ioba i te otoraa: *Ua ite hoi au e, te ora ra te faaora ia'u, e ia tae i te hopea ra e tia mai ai oia i nia i te fenua nei: e ia pohe tau iri nei i teie nei mati, e hi'o â vau i te Atua i roto i ta'u tino nei.*

Teie te faaroo o te mau taata atoa tei amui hoê i te Atua e tei faaurûhia e te Varua Maitai, e faatihia ratou i nia i te pohe ra. E ere ana'e i te oraraa i te pae varua ta ratou i tia-turi, te faatiaraa hoi o teie nei tino materia nei. Teie te auraa o te parau ra e, *tia-faahou-raa*, te mau mea atoa tei tuuhia i raro ra, e tia faahou mai ia te reira. E ere te faarueraa o te varua i te tino nei i te pahonora tia i te reira. O teie nei mea pohe noa te tuuhia i te pohe ore, e teie nei mau mea tahuti noa te tuuhia i te tahuti ore.

No te haapapuraa i te reira ua tuu Iesu i to'na varua i te taime i pupuhia'i Oia ei tusia i nia i te satauro. Ua tuuhia To'na tino pohe i raro, ua rapaauhia e ua tuuhia i roto i te menema tei paohia i roto i te mato. Ua tiahia te reira e te faehau Roma. I te toru o te mahana o to'na tanuraahia, ua haere mai oia i rapae i te menema ma te ora. Ua fa mai tana Iesu ra tei faasataurohia i rotupu i ta'na mau pîpî ei faaiteraa e, ua faatia-mau-hia to'na tino ma te faaite atu i te mau puta auri e te faatia ia fafa ratou ia'na, e ma te amui te maa e te parau atu ia ratou.

E ere te reira i te faaiteraa e, e mea mure ore te varua, e faaiteraa râ no te tia-faahou-raa o te tino. Area, ua faahuru-ê-hia taua tino ra. Ua faaruehia te toto tahuti noa i rapae i To'na tino e ua monohia ia i te hoê materia tahuti ore tei mono i te toto. Ua tanuhia ei tino tahuti noa, e ua faatiahia ei tino tahuti ore. Ua riro te reira ei hoho'a no te mau mea e tupu a muri atu. Ua riro oia ei matamua no te feia i mairi i te taoto ra, e ei aveia no te auhune rahi te tupu i te tau mahanahana no te faaoraraa.

Te hoê tumu rahi no te taraehara o te Faaora, o te faaho'iraa ia o te taata nei i to ratou huru mau tei moe na roto i te hi'araa. *Mai te taata i hope i te pohe ia Adamu, e hope atoa i te faaorahia i te Mesia.* Mai te pohe hoi i noaa i te taata ra, no te taata atoa e noaa i te tia-faahou-raa i te feia i pohe ra. Ua faito noa te raau i te ma'i i te rahi. E mea afaro maitai te opuaraa. No reira te Mesia i parauhia i te Tia-faahou-raa e te Ora. Na roto i To'na upcotiaraa inia i te hara e To'na horoaraa Ia'na iho ia pohe, o tei tia noa hoi Ia'na ia patoi, no te mea e mea hara ore Oia, ua noaa Ia'na te mau taviri no te tia-faahou-raa no te huaai atoa o Adamu tei riro ei repo puehu. No reira, e ere ia i te parau faufaa ore i te taima Ta'na i parau e, *te fatata mai nei hoi te hora e faaroo ai te feia atoa i roto i te apoo ra i tana reo, e e haere mai i rapae; e te feia i mau no i te parau maitai ra, e tia mai ia e rave i te ora; e te feia hoi i mau i te parau ino ra, e tia mai ia e rave i te pohe.*

Eita te tia-faahou-raa e tupu i te taima hoê, noa'tu e ua haapaohia ia no te taata atoa ra. Ia fa mai te Mesia, to tatou ora, e faaora Oia i tei faaroo ia'na na mua. No to ratou tiaturiraa i te Mesia e no to ratou fariiraa i to'na varua, e haere mai ratou i Ta'na pii, no te farerei ia'na. Te feia e noaa te tia-faahou-raa matamua o ratou ia tei pohe i roto i te Fatu e tei haamaitahia e tei mo'a. E faaauhia to ratou mau tino mai te au i To'na ra tino hanahana. Mai te au i to ratou tanuraahia i roto i To'na ra pohe, e faaau-atoa-hia to ratou tia-faahou-raa i To'na atoa ra. Oia hoi, e faahuru-ê-hia ratou e te hanahana Tiritiera, e e tuuhia ratou i roto i te hoê huru te faatia ia ratou ia farii i te iraa o te reira, e ia riro ratou ei feia tufaa e te Mesia.

E vai noa te feia parau-tia ore tei pohe i na tausani matahiti ma te faahuru-ê-ore-hia. E rave ratou i te auhune no te mau huero ino ta ratou i ueue i to ratou oraraa ra. E inu ratou i te hopea o te au'a avaava. E rahi a'e to te tahi faaui tu'araa i to te tahi, e e horoa te parau-tia i ta ratou mau

utu'a tia. E ia tia faahou mai ratou i roto i to ratoa mau huru mau, eita ia ratou e faahuru ê hia e te hanahana Tiretiera, area, e na reirahia ratou mai te au i ta ratou mau ohipa i roto i te ao nei. E faatiahia ratou i te tau e au no ratou, e e tia ratou i mua i te aro o te Metua ite hope e te faautu'araa a te parau-tia, e na te reira e faataa i to ratou oraraa a muri atu.

I roto i teie tau o te feaa, ua faateitei-roa-hia te feruriraa o te taata i nia a'e i te faaiteraa no te ra'i mai, e ua moe te reo o te faaroo i roto i te ahoa rahi o te paari taata nei, ua faarirohia te parau e te ohipa o te tia-faahou-raa ei mea faufaa ore e ua patoi-atoa-hia. Area râ, *e oti te mau mea atoa i tei faaroo*, e i reira e noaa'i i te feruriraa tei haamaramamahia te faufaa mau no te tia-faahou-raa.

Te mea tei tuuhia i roto i te ô i Edene e tei horoahia te mana i nia i te mau mea atoa i hamanihia ra, e varua ora ia tei tuuhia i roto i te hoê tino tahuti ore, e taata tei hamanihia i te hoho'a o te Atua. Ua mairi oia no te reira huru, e ua au-fau i te utu'a no te pohe. Mai te au i ta tatou i ite a'enei, e faaho'i te taraehara a te Mesia i te taata i to'na huru mata-mua. Eita ra te reira e tupu, maori râ, ia horoahia te tahuti ore i to'na ra tino. Na roto râ i te opuaraa rahi no to te taata faateiteiraa, e tia ia'na, e ta'na ra huaai, ia faaho'ihia oia i roto i te tahuti ore mai te tautururaa e te mau ite tei noaa ia'na e ia tuu-faahou-hia oia i nia i te e'a o te haereraa i mua ra.

A haamana'o maitai i teie, eita roa te oaoa mau e te mana e noaa i te tino varua maori râ ia noaa ia'na te hoê hiero te hamanihia i te mau materia o te tino nei. E haapii te varua i ta te varua, e e amui iho â te mau mea tei au maitai to ratou huru. Te titau nei te mau mea no te varua i te mau mea teitei roa a'e; te titau nei te mau mea o te tino i'o nei i te mau mea no raro roa; e teie na maehaa, te ore roa e tia ia faataahia, tei faaterehia e te ture o te parau tia, te rave nei raua i te oaoa e te mauruuru i roto i te vahi teitei a'e e te vahi haehaa roa a'e o teie nei ao hopea ore, e i roto i te ite mure ore. E ere i te varua, ma te tino ore i te mea maitai roa, e te titau nei oia ia ahuhia oia i te hoê tapoi paari a'e. Mai te mea aita to'na e tino, e haere to'na mau titauraa i te hoê noa iho pae e e taotiahia ia to'na oaoa e to'na haereraa i mua.

Ua faatupu-atoa-hia te utuafare i roto i te huru tino nei. Te faataa ê nei te pohe i te tane i ta ratou mau vahine, e te mau metua i ta ratou mau tamarii. Area, te tia-faahou-raa, i

roto i to'na huru teitei a'e, e amui faahou oia ia ratou e e tahoê atoa i te mau mea atoa tei moe i roto i te menema. E tia ia vai ia faaite mai i te oaoa, te hanahana, te mana, te teitei o te mau basileia e te tura te tupu no roto mai i te faa-oraraa no te pohe mai o te taata parau-tia e to'na ra utua-fare, o tei amui hoê i roto i te hau ma te mana no to ratou huru, te pae varua e te pae tino atoa hoi, tei tamâhia, tei faahuru-ê-hia e tei faarahihia e tae noa'tu i te îraa ma te mure ore i mua ia ratou no te raverâa i te ohipa mai te au i te mau opuaraa a te Atua? Eita roa e tia i te ite o te taata ia faaite mai i te reira, e eita roa e tia i te hoê feruriraa taata ia haroaroa i te reira, maori râ, ia noaa ia'na te maramarama no te ra'i mai.

Na vai e faaite mai i te hopea ore, e e faaite mai i te mau otia no te mana o te Atua? Ua hunahia te ite no te oraraa nei i te mau feia feruriraa hohonu. Aita â ratou i ite i te mana te faahuru ê nei i te mau mea atoa e tae noa'tu i te mea iti roa a'e o te mau mea e ora nei. Eita e tia ia ratou ia haroaroa i te mana o to ratou iho feruriraa. Eita e tia ia ratou ia tatara mai i te tumu no te reira, e i reira ua faito ratou i te mau taata haapii-ore-hia. Te tupuraa mai o te raau no roto mai i te huero, te tereraa o te oraraa na roto i to ratou poheraa, o te hoê ia miterio tei ore â i tatarahia. E tia anei ia tatou ia parau e, eita e tia i te Mana, te faatere nei i te ao atoa nei, ia faaora faahou i te hoê tino pohe?

Eiaha ia moe ia tatou e, eita roa te hoê a'e materia e mou roa e hoê iti a'e, noa'tu i te mau raverâa atoa. Te mea i parauhia nei e, e poheraa, o te faahuru-ê-raa ia o te huru. E ere i te mau materia atoa i te mea ite-mata-hia. Eita te hoê tino, ia faahuru-ê-hia, e ite-faahou-hia e te mata o te tino nei. Te mana e faatere nei i te ao nei, e mea ite-ore-hia ia e te mata taata nei, e noa'tu e, ua itehia te tahi mau ture o te faatere i te reira, te vai nei te rahiraa tei ore roa i itehia, e o te hopea ia o te teoteo o te feia tei noaa ia ratou te tahi mau tufaa rii ite o taua mau mea ra ia parau e, eita tana mau mea ra e tia, no te mea aita te reira i haroaroahia e ratou e ua taotia i te puai o te mana tei ore i itehia e ratou e hoê iti a'e.

Mai te mea ua tia mai te hoê tino mai te pohe mai, ua milioni atoa ia te mau tino te tia ia faaorahia. Te matamua râ, tei roto ia i te taata ra o Iesu no Nazareta, e ua riro oia ei oho matamua no te taata atoa. A vaiiho i te mau tamarii tamaroa e te mau tamarii tamahine ia oaoa e ia faaite i to ratou mauruuru Ia'na o tei faatae mai i te reira faaoraraa

rahi. Ua vî te pohe e aita to te apoo e ri'ari'araa faahou. Ua tuuhia mai te ora e te tahuti ore i te vahi maramarama. Ua iritihia te mure ore, e ta'na mau ohipa, i te mau mata. E na roto i te mana no te tia-faahou-raa tei tuuhia ia Iesu Mesia, e tuu mai te ao atoa nei i to'na mau feia i pohe ra, e i reira e tia mai ai te metua o te taata nei, oia hoi, o Adamu, *To te mau mahana tahito ra*, i mua i to'na ra mau huaai tei faahurn-ê-hia e tei faaruperupehia e te varua o te ora; e a parauhia'i o Iesu, te Tamaiti, ei Faaora rahi, e faaturahia e e haamorihia te Atua, te Metua mure ore, e a muri noa'tu ei tumu no tatou nei e no reira mai hoi te ora, te maramarama, te mana, e te hanahana i te pihaaraa i roto i teie nei ao atoa.

*Papaihia e C. W. Penrose, te hoê Aposetolo
Faauhia ei reo Tahiti e K. R. Stevens
Peresideni Misioni*

EDITORIALE

"E Bibilia, E Bibilia hoi ta matou, e aore atu â Bibilia ta matou e hinaaro. E Bibilia anei ta outou, maori râ o tei no ô mai i te ati Iuda ra? . . . Aita outou i ite e, i hamani au, o te Fatu to outou Atua, i te taata atoa, e ua haamana'o hoi au i tei nia i te mau fenua moana ra; e te faatere nei au i roto i te mau ra'i i nia ra, e i roto hoi i te ao i raro nei, e te faatupu noa nei â i ta'u parau i te tamarîi a te taata nei; oia ia, i te mau fenua o te ao atoa nei? E no te mea e Bibilia ta outou, eiaha outou e mana'o e, tei roto i te reira te ta'u mau parau e hope roa'e; e eiaha atoa outou e mana'o e aore atu â parau i papaihia i ta'u ra faaue." 2 Nephi 29:6-10.

Oia mau, teihea te parau no te raau a Epheraïma tei parauhia i roto i te buka a Ezekiel, pene 37, irava 16 e tae noa'tu i te 21, o te na ô mai nei e, *E rave â hoi oe, e te tamaiti a te taata na, i te hoê raau, a papai ai i nia iho, Na Iuda e na te tamarîi a Iseraela, o to'na ra mau hoa, e mai reira hoi, a rave ai i te tahi raau, a papai ai i nia iho, No Iosepha, te raau na Epheraïma, e te utuafare atoa o Iseraela, o to'na ra mau hoa . . .*"

E teihea hoi te parau mau, e te tupuraa mai, mai te au i te parau i roto i te Salamo: "Te fatata maira te ora na'na i te feia i mata'u ia'na ra; e faatupu oia i to'na hanahana i to tatou nei fenua. O te aroha e te parau mau ua farerei ia raua; o te parau-tia e te hau ua hoho'i raua. E tupu mai te parau mau no roto mai i te fenua, e hi'o mai ho'i te parau-tia mai te ra'i mai. Na Iehova hoi e horoa mai i te mea maitai, e hotu mai â hoi to tatou fenua. E na mua ia'na te parau-tia i te haere, e na te reira e faaite mai i to'na haerea." Salamo 85:9-13.

E mai te aha te huru o te tupuraa o ta Isaia tohuraa, "E tuu-haehaa-hia oe i raro roa; e mai te mea no raro mai i te repo ta oe parauraa mai; e riiri mai to oe reo mai raro mai i te repo ra: na raro mai i te fenua to oe reo, mai te reo o te auba ra, e ei raro oe i te repo e mutamuta noa mai ai ia parau." Isaia 29:4.

E a ore râ, te buka tei parauhia e ana: "Te parau i roto i te buka piahia ra ia outou peneia'e ia tuuhia'tu i te taata ite i te tai'o parau ra, a na ô atu ai, A tai'o na oe i tera ra buka; te parau maira oia, Eaha e tia'i ia tai'o, tei piahia; e ia hopoi hoi i taua buka ra i te taata aore i ite i te tai'o parau, a na ô atu ai, A tai'o na oe i tera ra buka; te parau maira oia, Aore au i ite i te tai'o parau." Isaia 29:11,12.

A TAI'O I TE BUKA A MORMONA, PENEIA'E E PAHONOHIA.

TE PARAU AUTAHU'ARAA

No te Ava'e ME

TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Me 5. SIMONA PETERO. Mataio 4; 8:14; 16:7,13-19; 17:1; 26:33-37; Mareko 1:16-20,29; 5:37; 16:7; Luka 5:1-11; 4:38; Ioane 1:40-42; 6:66-71; 21; Te Ohipa 2:5; 12:1-19; 15:14; II Petero 1:1; I Korinetia 3:11.

Me 12. ANEDEREA. Mataio 4:18; 10:2; Mareko 1:16, 29; 13:3; Ioane 1:40,44; 6:8; 12:22.

Me 19. IAKOBO. Mataio 4:21; 17:1; 26:37; Mareko 1:19; 9:2; 10:35,41; 13:3; Luka 5:10; 8:51; 9:28, 54; Te Ohipa 12:2,

Me 26. A haapii atu i te parau no na Haapii Hahaere no te ava'e i mua, mai tei papaibia i roto i te ve'a no te ava'e no Me.

Na Te Mau Maapii

Mahaere na te Mau Utuafare

Te mau faito o te Ekalesia, hoê â ia faito i to te Evanelia a Iesu Mesia. Te mau haapiiraa o te Faaora, a vai ai oia i nia i te ao nei i te tino tahuti, e te mau haapiiraa ta'na i ho-roa mai i to te ao nei na roto i te mau peropheta, mai to'na faasatauro-raa-hia e to'na tia-faahou-raa, ua faatia-mau-hia ia e te mau faito o te Ekalesia. Ia riro teie mau faito ei faito no te meloraa o te Ekalesia e maitai ai.

Tei roto i te Ekalesia te parau mau e te parau-tia i te mau mea atoa—ia tatou iho, i ta tatou raveraa i to tatou taata tupu, i to tatou mau mana'o, e i ta tatou ohipa. E ore roa te Ekalesia e faatia i te hoê noa'tu rave-ê raa no te mau faito o te parau-tia.

(A hi'o i te tuatiraa i te api 64)

TE SOTAIETE VAHINE TAUTURU

No te Ava'e ME

Irava tamau aau: 2 Nephi 4: 30

A oaoa, e to'u aau e, a tiaoro atu i te Fatu, a parau atu e, E te Fatu, e arue au ia oe e a muri noa'tu; oia ia, e oaoa tau varua ia oe, e tau Atua, e te Mato e ora'i au ra.

Mahana Maha (Matamua)

Mahana iritiraa mana'o e te himene na te mau tuahine.

Parau tumu no na Tuahine hahae: Te Here i te utuafare.

Ei atiraa aroha mau to outou ia outou iho, i te aroha taeae ra; i te faaturaraa'tu te tahi i te tahi. (Roma 12:10)

Ua i o Iesu i te aroha i te mau taata no Ierusalema. Ua ta'i Oia ia ratou noa'tu e te hamani ino maira ratou Ia'na. Ua faaite Oia i to'na here i te mau tamarii i roto i te Mareko 10:13-16.

Mahana Maha (Piti)

NEPHI, te tamaiti a LEHI

O Nephi, o te hoê ia o te mau peropheta rahi roa a'e tei ora i nia i te fenua nei. Ua i oia i te faaroo e te itoitto; ua here oia i te Fatu ma to'na aau atoa. Ua riro oia ei aratai mau na roto i to'na faaroo e to'na itoitto, e na to'na haehaa i horoa ia'na i te puai e au i to te ra'i. Ua riro oia ei peropheta, ei hi'o, e heheu parau, e mai te mau peropheta atoa, ua faainohia e ua hamani-ino-hia e te mau taata tei tia ia here mau ia'na.

Te tereraa na roto i te medebara. I Nephi 2:1-7; 7; 16:34-39.

Mahana Maha (Toru)

Ua hamani o Nephi i te hoê pahi. Ua patoia oia e to'na mau taeae tei faahapahia. I Nephi 17; 18.

Mahana Maha (Maha)

Ua arue Nephi i te Fatu. II Nephi 4:14-35.

Ua faataa Nephi ia'na iho i to'na mau taeae iino. II Nephi 5:1-11, 15-18.

Te pure hopea a Nephi. II Nephi 33.

Mahana Maha (Hopea)

Mahana raveraa ohipa na te mau tuahine.

TE HAAPIIRAA SABATI

No te Ava'e ME

PUPU PARAIMERE

Irava tamau aau: *I Samuela 13: 13*

E mea tia ore ta oe i rave; aita oe i haapao i te parau a to Atua ra a Iehova, ta'na i parau mai ia oe ra; ahiri hoi oe i na reira, ua haamau roa ia Iehova i to oe mana toroa arii ra i nia ia Iseraela e a muri noa'tu.

Me 5. Ta Saula tusia taauahi. I Samuela 13.

Me 12. To Saula hape. I Samuela 15:1-35.

Me 19. Te tamaiti tia mamoe no Bete-lehema. I Samuela 16:1-23.

Me 26. Hi'opoaraa.

PUPU PITI

Irava tamau aau: *Exodo 3: 6*

E ua na ô maira oia, O vau te Atua o to mau metua na, O te Atua o Aberahama, e te Atua o Isaaka, e te Atua o Iakoba. Ua purou ihora Mose i to'na mata, i mata'u hoi oia ia hi'o atu i te Atua.

Me 5. To Iakoba haamaitairaa'tu i ta'na mau tamarii. Genese 48; 49.

Me 12. Te vau ahuru matahiti ineineraa o Mose. Exodo 1: 8 e tae noa'tu i te hopea o te pene 4.

Me 19. Ua faatia Mose i te oro'a pasa. Exodo 11:1 e tae noa'tu i te 13:22.

Me 26. Hi'opoaraa.

PUPU TORU e te MAHA

Irava tamau aau: *Genese 14:20*

E ia haamaitaihia hoi te Atua teitei o tei tuu mai i to mau enemi i to rima na. Ua tuu maira i te ahuru i taua mau tao'a atoa o te pau ra no'na.

Me 5. To Aberahama faaoraraa ia Lota e ta te Atua fafau-raa ia'na. Genese 14:12-20; 15.

Me 12. Te na oire o Sodoma e Gomora. Genese 18; 19.

Me 19. Aberahama raua o Abimeleka e to Aberahama poheraa. Genese 20; 25:1-10.

Me 26. Hi'opoaraa

TE FEIA API



No te Ava'e ME

Irava tamau aau: *Mataio 5:28*

Te parau atu nei râ vau ia outou, o te hi'o noa'tu i ta vetahi ê ra vahine ei faatupu i te hinaaro, ua faaturi ia ia'na i to'na ihora aau.

Me 5. TO IESU A'ORAA I NIA I TE MOU'A RA. Mataio 5, 6, 7; Luka 6:20-49; Buka a Moromona: III Nephi 12, 13, 14.

Me 12. MAI TE HOÊ TEI HAAMANAHIA. Mataio 7:29; 9:2-6, 34; 12:22, 23, 38-45; Luka 7:1-17, 24-31, 36-52; Ioane 4:46-53.

Me 19. E RAVE RAHI TE PARABOLE TA IESU I PARAU ATU IA RATOU RA. Mataio 13; Isaia 6:9; Moromona 9:25-27.

Me 26. A FAAEA, A MANIA. Mataio 8:23-34; Luka 8:22-39; Mareko 4:35-41; 5:1-19.

Na Te Maapii Mahaere Na Te Mau Utuafare

(E tuatiraa no te api 61)

Te faahapa nei te mau mana'o viivii e te mau ohipa viivii i te faito o te Ekalesia. Te Feia Mo'a mau, o ratou ia tei mā i te mana'o e te ohipa.

Te titau nei te mau faito o te Ekalesia ia faaroo tatou i te hoê Atua ora; faaroo i te Faaora e i ta'na ohipa mo'a; faaroo i te peropheta ra o Iosepha Semita e i to'na mau mono; te faaturaraa i te Autahu'araa e te mau faaueraa a te Fatu e te mau haapiiraa a ta'na mau tavini; te haapaoraa i te mahana Sabati; te faaturaraa i te mau mea no te Hau metua, e vetahi atu â mau mea.

Na teie mau faito e faaite mai ia tatou i te ravea ia tae i te ora mau. O ratou tei haamaitaihia, tei mauruuru, e tei oaoa i te mau mahana atoa, ua na reira ia na roto i te haapao-maitai-raa i taua mau faito ra te ore e faahuru-ê-hia. E te tumu e ore ai ratou e faahuru-ê-hia, no te mea, ua faatumu-mau-hia ia i nia i te parau mau.

TE HAAPIIRAA PARAIMERE

No te Ava'e ME

Irava tamau aau: *Maseli 3: 1, 2*

E tau tamaiti, eiaha e haamoe i ta'u nei a'o; ia haapao maite to aau i ta'u nei ture: e maoro hoi to oe ra pue mahana e to oe ra mau matahiti, e te ora hoi e te hau ta te reira e amui mai.

MAHANA MAHA MATAMUA

Te Faufaa i Hunahia

Ua hinaaro te hoê Taata Faaapu, tei faufaahia na roto i ta'na ohipa e to'na faaoromairaa i roto i to'na oraraa, ia na reira atoa ta'na mau tamarii e ia pee ratou i te e'a o to ratou metua tane. No reira, i to'na iteraa ua tae oia i te hopea o to'na oraraa, ani atura oia i ta'na mau tamarii ia haere mai ia'na, e parau atura oia ia ratou,

"E tau mau tamarii, hou a faarue atu ai au ia outou, te hinaaro nei au i te faaite atu ia outou e, te vai ra te hoê faufaa rahi tei hunahia i roto i ta'u ô vine; e i muri a'e i to'u faarueraa ia outou, a imi papu outou i te reira e tae noa'tu i te taime e itehia ia outou."

I muri a'e i to taua Taata Faaapu maitai poheraa, haere atura ta'na mau tamarii e heru i te mau vahi atoa i roto i taua ô vine ra ma te tiaturi e, e noaa ia ratou te hoê farii tei i te auro.

Aita te hoê auro i itehia, area râ, no to ratou utaru-maitai-raa i taua ô vine ra, ua rahi roa te hotu ta'na i horoa mai—aita â i faito mai i te reira—e hotu tei faariro i te mau tamarii a te Taata Faaapu ei feia moni. No reira, ite atura ratou i te faufaa rahi tei noaa na roto i te ohipa, e oia mau, ua riro te raveraa ohipa ei faufaa rahi a'e na te taata nei.

MAHANA MAHA PITI

Te Luko e te Liona

I te hoê mahana a haere ai te hoê Luko e te hoê Liona, faaroo ihora rana i te tahi mau mamoe i te ta'iraa.

Parau atura te Luko, "A faaroo na i tera mau mamoe! A faaea na oe i ô nei, e tau Fatu, e haere na vau i ô i te aua mamoe, e e afai mai au i te hoê vahi mamoe maitai roa no ta oe tamaaraa."

Haere atura oia i to'na tere ma te vitiviti e te mana'o papu i roto ia'na iho e, e manuia oia. I to'na ra taeraa i pihai-iho i te aua mamoe, ite ihora oia e, e aua paari maitai tei

tamau-maitai-roa-hia; e te vai atoa ra i reira te tahi mau uri rarahi tei taoto i pihai-noa-iho i taua aua ra. I to'na iteraa i te reira mau mea, feruri ihora te Luko e, e mea maitai ia vaiiho noa'tu i te mau mamoe e ia ho'i atu i pihaiiho i to'na hoa.

"E mea papu, e mea rahi te mamoe i ō atu!" o ta'na ia parau a farerei faahou ai oia i te Liona, "tera râ, e mau mamoe hi'oraa ino roa e te ivi atoa hoi, no reira, e mea maitai a'e ia vaiiho noa'tu taua ia ratou e tae noa'tu i te taime ua rahi a'e te i'o i nia i to ratou mau ivi."

O te huru ia o te taata mātā'u noa, e noaa iho â ia'na te hoê otoheraa no te faaatearaa ia'na iho i te hoê peapea.

MAHANA MAHA TORU

Te Puaa oviri e te Asini

I te hoê mahana tatama'i atura te hoê Puaa oviri e te hoê Asini no nia i te tahi ohipa, e i te hopea ua faaoti ihora raua e, e tito raua no te faaotiraa i taua peapea ra. Ua tiaturi te Puaa oviri i nia i to'na mau niho rarahi tei oo'i maitai, e ua mana'o atoa hoi oia e, aita ta te Asini e ravea no te paruru i to'na upoo e to'na mata, no reira, e mea ohie to'na pohe.

I reira, horo u'ana atura oia i nia i te Asini tei tia'i noa ia'na, e i te au-maitai-raa to'na atea, huri oioi atura te Asini e patu ihora i nia i te upoo o te Puaa. Otohe atura te Puaa ma te hihipo e te maere hoi. E i te taime i tia'i ia'na ia paraparau faahou, na ô atura oia, "Oia mau, aita roa vau i mana'o e roohia vau i te pohe i te reira hopea o oe ra."

O te reira iho â te huru, e tae mai te ati, i te rahiraa o te mau taime, na te pae i mana'o ore-hia.

MAHANA MAHA MAHA

E Kamela iho a i te Hi'oraa

I to te tahi mau taata iteraa i te hoê kamela no te taime matamua, ua horo ê ratou no to ratou mātā'u i te hoê puaa huru ê mai te reira. I te piti o to ratou iteraa i te reira, e no te mea aita te reira animala i haapeapea ia ratou, tapiri rii ihora ratou no te hi'o-maitai-raa'tu ia'na.

Ia pinepine to ratou iteraa i taua animala ra, ite atura ratou e, e animala mārû e te faaoromai hoi oia, no reira, haru atura ratou ia'na, faatavaha atura e faauta atura i te mau taihaa i nia ia'na e faariro atura ratou ia'na ei tavini no ratou. E aita i maoro i muri iho, riro atura taua animala ra ei mea maere-ore-hia, mai te uri e te asini te huru.

Hoê â hoi te mau mea atoa, mai te mau ohipa ino, e hi'oraa ri'ari'a i te haamataraa, e ia maoro, e ia mâtau te taata i te rave i te reira, e riro ia ei mea haapao-ore-hia.

MAHANA MAHA HOPEA

Na te orometua iho o te Pūpū Paraimere e maiti i te hoê haapiiraa au maitai no te reira mahana.

Te Ora No Te Taatoaraa E No Te Taata Hoê Ra

A TAMATA na tatou i te feruri—te ora nei tatou i nia i te ao nei, e e mea papu, ua vai tatou hou teie nei ao, no te mea, aita e ravea ia hamani i te hoê mea no roto mai i te aore. Eita e nehenehe ia faatia i te hoê fare raau, maori râ, ia haaputuputuhia te raau hou te hamaniraahia, e no reira, te vai noa ra ta tatou mau ohipa tataihoê tei ravehia. Ua hapii tatou, e ua roaa mai te pereve no te reira ao na mua i te tomoraa mai i roto i teie nei ao, e ia tatou o tei roaa mai te pereve o taua ao ra, aita ta tatou e ravea i reira ia haere â i mua, maori râ, ia haere mai i nia i te ao nei, a rave atu ai i te hoê tino tahuti noa e te ite no te pae tino nei. Ua opuahia teie mau mea atoa e te Atua a vai ai tatou i te ao varua; ua faaroo tatou i ta'na opuaraa, ua ite tatou i te maitai o te reira, faatia ihora tatou.

Ua na ô maira te Atua Metua, 'E haere tatou i raro e hamani i te taata mai te au i to tatou iho hoho'a'. E ua na reirahia e te Atua; ua hamani Oia ia Adamu raua o Eva na roto mai i te repo fenua, e ua horoa'tu oia ia raua te faatere-raa o te mau mea i nia i te fenua. E i teie nei, aita te hi'araa o Adamu raua o Eva i faahuru ê i te opuaraa a te Atua. E ere hoi i te mea apî ia'na— *Ua hi'a Adamu ia vai te mau taata, e te vai nei te mau taata ia roaa to ratou oaoa. 2 Nephi 2:25.* Mai te pohe hoi i noaa i te taata ra, no te taata atoa e noaa'i te tia-faahou-raa i te feia i pohe ra. *Mai te taata i hope i te pohe ia Adamu e hope atoa i te faaorahia i te Mesia. 2 Korinetia 15:21, 22.*

Ua haere mai te Mesia i to'na tau e ua faatia a'era i te î-raa o ta'na Ekalesia, e ua haere atura ma te haapii e te faa-oraraa i te mau ma'i, ua rau ia te huru. Ua rave rahi te taata tei pee na muri ia Iesu ia hi'o noa i te mau ohipa maere i ravehia e ana, aita râ ratou i faaroo ia'na ei Faaora no to

te ao nei. Ua parau atu râ te Mesia ia ratou, *Ia ore outou ia ite i te tapao e te piri ra e ore outou e faaroo. Ioane 4:48.*

Ua horoa mai râ Oia i to'na ora no te hara o to te ao, e na'na hoi i horoa mai i te taviri no te tia-faahou-raa, ia ore roa to tatou mau tino ia taoto noa i raro a'e i te repo—e no reira mau ia e roaa mai ai **TE ORA NO TE TAATOARAA E NO TE TAATA HOÊ RA.**

Papaihia e Pereti, P. B. Asay

Te Aroha I To Te Ao Nei

AROHA mai te Atua i to te ao nei, e ua tae roa i te horoa mai i ta'na tamaiti fanau tahi ia ore ia pohe te faaroo ia'na ra, ia roaa ra te ora mure ore. Ioane 3:16.

Mai te au i te mau parau mo'a tei faaitohia mai, te ite papu roa nei tatou, na to tatou Atua iho i horoa mai i ta'na Tamaiti ei taata faaora no tatou, e ua na reirahia oia na roto i te aroha i to te ao nei. Area râ, aita e nehenehe ia tatou ia faaorahia, maori râ, ia haapao maitai tatou i te mau faaueraa e te man ture na roto hoi i te aroha.

Ua parau mai Ioane, te aposetolo i herehia e Iesu, i te parau e, *E au mau here e, e aroha tatou ia tatou iho, no ô mai hoi te aroha i te Atua ra, e o tei aroha ra, ua faafanauhia ia e te Atua, e ua ite hoi oia i te Atua. O te ore i aroha ra, aore ia i ite i te Atua; e aroha hoi te Atua. I Ioane 4:7,8.*

Eaha te aroha? O teie ia te pahonora: O te Atua hoi te aroha. *E o tei parahi i roto i te aroha ra, te parahi ra ia i roto i te Atua, e te parahi ra te Atua i roto ia'na ra. I Ioane 4:16.*

E rave rahi te mau ravea e nehenehe ai ia tatou ia roaa te aroha, e teie te tahi o taua mau ravea nei, te matamua, na roto i te raveraa i te mau ohipa ma te itoitoe e te parau mau, te piti, te faaoreraa i te hara, te toru, te parau-tia, e te hopea, te aroha atoa hoi. Te ite nei tatou paatoa, ua faatiabihia te Ekalesia a te Mesia na nia i te aroha, e no reira, ia hinaaro tatou i te rave i te ohipa a te Atua, e na reira iho â tatou, na roto i te aroha e te haapao-maitai-raa o taua mau ravea nei.

Ua uihia maira Iesu e te hoê taata, teihea te parau rahi i roto i te ture; ua na ô atura Iesu ia'na ra, *Hinaaro oe i to Atua ia Iehova ma to aau atoa, e ma to varua atoa, e ma to mana'o atoa, o te ture matamua teie e te hau i te rahi. E mai te reira atoa te piti, E aroha'tu i to taata tupu mai to aroha ia oe iho na. Mataio 22:37-39.*

O tatou nei o te mau tamarī hoi a te Atua, no reira e mea tia ia tatou ia rave i te mau ohipa mai te au i tei hinaarohia e te tatou Metua ra. Te faaite mai nei te Bibilia e, *Ia riro tatou atoa ei hoê, mai ia oe, e tau Metua i roto ia'u nei ra, e mai Ia'u hoi i roto ia oe na, ia hoê atoa ratou i roto ia taua, ia faaroo to te ao e na oe au i tonu mai.* Ioane 17:21.

E no reira, ia feruri noa tatou e faufaa anei to te aroha? E nehenehe anei ia tatou ia rave maitai â i ta tatou mau ohipa ia ore ia vai te aroha? Aita roa, e e rave rahi atu â te mau mea te riro ei faufaa ore, maori râ, ia vai te aroha.

E no reira, e homa, ia tamata noa tatou ia roaa ia tatou te aroha i roto i taua mau ohipa ra a te Atua, to tatou Metua, e ia na reira tatou, e tupu iho â te rahiraa o to tatou mau utu'a maitai.

Papaihia e Iosepha, J. G. Stevens

E Mea Fatata Te Hora

U A ite papu roa vau e, te vai nei te Evanelia mau i roto i te Ekalesia a Iesu Mesia i te Feia Mo'a i te Mau Mahana Hopea Nei. E ua ite atoa vau e, ua faaho'i mai te Atua iho i te Evanelia i nia i te ao nei, i teie mau mahana hopea nei, na roto mai i ta'na peropheta ra o Iosepha Semita. Oia ia, ua ite atoa vau e, e peropheta mau o Iosepha Semita. E ua ite papu roa vau e, te mau mea ta'u e papai nei, e parau mau ana'e ia. No reira, a faaroo mai outou.

E homa e, te na ô maira te Atua ia tatou, ua teatea te aua, ua fatata te auhune, e te hora ahuru ma hoê teie, e te titauraa hopea teie i te rave ohipa i roto i ta'u ô vine. Oia ia, e mea poto roa te taima toe hou te haere-faahou-raa mai o Iesu.

No reira, a faaineine tatou paatoa i te e'a afaro e te e'a pirihao, e a haapao tatou i ta'na mau faaneraa e ta'na mau ture. Teie ia te ravea no te feia teoteo, e te parau-tia ore, e te feia ino roa.

E inaha hoi, e tae mai Iesu "ma te auahi ura ra, i te tuuraa mai i te pohe i te feia aore i te i te Atua e tei ore i faaroo i te evanelia o to tatou Fatu o Iesu Mesia ra. O te utu-ahia mai ia i te pohe mure ore, mai te aro atu o te Fatu ra, mai te anaana o to'na ra mana." 2 Tesalonia 1:8,9.

E inaha hoi, te na ô maira te hoê peropheta, "Te fatata roa mai nei te tau e faaorehia'i to Satane mana i nia i te aau o

te tamarī a te taata nei; te fatata mai nei hoi te tau e riro ai te feia teoteo e tei rave i te parau-tia ore ra mai te aihere e e tae mai hoi te mahana e ama'i ratou." 1 Nephi 22:15.

Te pure noa nei â vau i te Atua, e te ani atu nei au ia'na ia tauturu noa mai ia tatou i roto i to tatou tatarahaparaa, e te ani atu nei hoi au ia'na ia faaore i ta tatou mau hara i te tautururaa mai ia tatou i te haapaoraa e te tameraa i ta'na mau faaueraa e ta'na mau ture atoa. O to'u pure teie i te Atua i te i'oa o Iesu Mesia. Amene.

Papaihia e Petarona, L. Y. Peterson

PARAU API NO TE MISIONI

I roto i te ava'e no Febuare i mairi a'enei, ua faarue na Orometua ra o Horate, H. G. Wilde raua o Viliamu, R. W. Young i te fenua ra o Moorea no te haere e rave faahou i te ohipa i te mau fenua i raro, oia hoi, i Raiatea ma.

I teie ava'e i mairi a'enei ua reva na Orometua ra o Pereti, P. B. Asay raua o Iosepha, J. G. Stevens no te ho'i atu i to raua fenua ai'a. Ua rave raua i te ohipa orometua i teie mau pae fenua, ma te itoitō, i na matahiti e piti e taita'a.

PARAU API ORC'A

BAPETIZORAA

I'OA	MAT.	MAH. BAP.	FENUA	NA VAI I BAPETIZO
James Tyler Hubbard	68	11-2-40	Papeete	Rutena Allred

TE HURU O TE TAMA'I

Ua riro teie tama'i tupu apī mai te hoê pere faannunuu na roto i te mau huru i tupu, mai to'na haamataraa mai, e na roto hoi i te mau raveraa aro pae e piti e aro ra.

E te na pae e aro ra, ua ite ia tatou e, o vai te aro ra no te haru i te mau na faatere faatitī i te ao nei, e o vai te paeau e aro ra no te paruru i te rararaa hau e te fanao o te ao nei.

A 20 matahiti to te paeau opuaraa ino, e te paeau ri'ari'a, faaineineri no te nanao i te mau basileia atoa, e i te mau nunaa atoa, mai te tiatu papu maitai e, e manu'a ohie noa te reira.

E na roto i te avariraa te Hau i opua i taua huru ra i ta'na faataaraa, ite papu mau atura to te ao nei e, aita'tu e ravea no te tinai atu i taua huru mehameha rahi ra. E mai ta tatou i tai'o e i faaroo ra, ua faatū te basileia amo parau-tia i te basileia o tei taataahi i te reira.

E mai te mea e, te rahi ra te tima Paratane e ati ra i te reira huru rave aita pai ia e parauraa, no te mea te aro ra te reira Hau i te enemi, e no mea hoi aita te rahiraa tima Paratane e faaea i te teretere. Area, te aro te mau tima Hau tama'i ore - e ohipa tia ore mau â tera e e ohipa rave re-hia hoi e te etene i mutaa ra. Ua imi râ Farani e Paratane i te mau rave

no te arai i tera ravea topita haapainu na te moana. E no reira hoi i iti ai te faito o te rahiraa pahi Farani e Paratane e ati ra i teie nei - ua tiaturi atoa te basileia i na reira e o te ravea faahiahia tera no te faatuturi ia Farani e ia Paratane, na metua tia i o te ao nei.

Ua tupu te mau orero e te mau peu haamäta'u, e te haavî, e aita te reira mau huru i maoro te manuïaraa. Ua tamata ta te parau-tia haapiiraa i te arai i te ohipa tama'i haamanii toto - i te ohipa haamauiui taata - i te ohipa haapohe taata e i te tumu haaveve i te ao nei. E mai ta tatou atoa i ite, aita roa te reira i haapaohia, e aita roa hoi te reira i fariihia mai e te enemi. Tupu ihora te ravea arai na roto i te puai, e o te reira te tupu ra, mai te 1 no Setepa mai - oia hoi, a 5 a'enei ava'e.

Te tama'i ra to tatou paeau na roto i te haapao e te faatura hoi i te mau ture faataahia e fafauhia e te mau basileia atoa. Te tama'i mai ra te enemi na roto i te haapae e te faatura ore i tana mau ture ra i fafauhia ra, no nia i te fenua, no raro i te tai e na te reva hoi. E no te farerei-papu-raa te enemi i te u'ana e i te manuïa o te nuu o te paeau tiamâ, ua tamata ihora te enemi i te mau ravea faaamaha nunaa, faaorure nunaa e te ravea totoâ hau a'e. Ua tai'o atoa tatou i tera ravea haapainu i te topita o tei riro ei totoâ ino roa i te mau pahi hara ore o te mau basileia tama'i ore, e ei ati no te feia horo pahi e te feia ratere tama'i ore.

E e hape huru hape to te nunaa Purutia na roto i te mana'oraa hoi ratou e, e vi na nunaa Farani e Paratane i mua i te faatereraa faahepo e amopoiri-noa-hia ra e ratou. Aita roa'tu te Hau Purutia e te nunaa Purutia i mana'o e, e maoro teie tama'i api na roto i te ineine maitai o to ratou puai totoâ nunaa. Aita atoa te Hau Purutia e te nunaa Purutia i mana'o e, e afai roa na Hau Farani e Paratane i nia i te vahi e i te otia e farereihia ra e te Purutia.

Ua ite ana'e râ e ua ite atoa hoi ratou i te otia o te faaafaroraa e o te faahoonaraa o teie tama'i - e o tei mäta'u rahihia te reira e ratou. Ua rau to Purutia tamataraa i te faafaaea i teie tama'i - aita i manuïa. Ua rau to Purutia hinaaroraa i te tahi basileia i rapae, e faahau i teie tama'i - aita atoa hoi i manuïa. Ua rau a'enei to Hitler oreroraa i te mau parau faahoruhoru - aita hoi i taiâhia. Ua parau hoi Hitler, i teie mau ava'e i mairi a'enei e, ua oti te taime no te parapauraa - e ua taeahia te taime no te faatuhatuha i te pupuhi. Ua tia i tatou, e te nunaa Purutia, i te reira e aita hoi i tupu. Ua taa-maitai-faahou-atura ia tatou e, e taata vaha rahi mau â o Hitler.

Area, te nunaa Purutia ra, te maere ra e te haamata ra i te ite i te faaninamu. Ua mutamuta, ua ite, ua vahavaha e ua feruri te tahi paeau o te nunaa Purutia i te hape rahi i horomiihia e ratou. Eaha hoi ta te nunaa Purutia i roaa mai na roto i to ratou vareraa i te mau parau, i te mau tohu a to ratou upoo mana faatere. Te farerei râ hoi ratou i te ati mauui, i te ati pohe, i te ati veve, i te ati tarani, i te haama, i te ati hepohepo e i te ati fanao-ore-raa. No te mea - mai te huru nunaa mau auri ratou i teie nei - na roto i te ore-roa-raa i ô ratou te mau huru fanao e fanao-noa-hia nei e to tatou paeau, e tatou atoa nei hoi.

Na roto i te aratohia ratou i roto i te tama'i ri'ari'a - na roto i te ore ta ratou mau hoo e tae i rapae - na roto i to ratou amuraa i te mau ture etae-ta hopea roa. Te hinaaro ra hoi te afa rahi o te nunaa Purutia i teie nei ia

faabauhia teie tama'i; aita râ ta ratou e ravea i mua i te mana hope ta ratou iho i tuu i nia i te taata o Hitler, ta ratou i faariro i mua a'enei ei faa-ora.

Eita hoi e nehenehe ia ratou ia patoi, ia parau, ia marô - e utu'a pohe e te utu'a tapea to te reira, i ô ratou. Aita atura â ratou e ravea, maori râ, te amo, ahoaho, te navai ore, te mauui, te tatarahapa, te pohe, te ri'ari'a, e te farii i ta ratou iho i ueue ra, ta ratou iho i tanu ra. No reira hoi, te amu ra te nunaa Purutia mai ta te papai i haapii mai - oia hoi, e amu outou i te hoturaa o te huero ta outou i ueue ra.

Na roto i te mau radio e te mau ve'a faaite parau apî ia tatou - te tia i ra to nia i te tahua ohiparaa i te tau mahanahana o te haamata i te hopea o te ava'e Febuare. Ei reira pai ia tatou e ite ai i te buru o te mau opuaraa apî a te enemi e i te huru o te faanahoraa a to tatou paeau no te reira mau huru.

Ua tamata atoa Purutia i te faari'ari'a i na basileia nainai tama'i ore ra o Beletita e o Holane. Ua haaputu hoi Purutia i te hoê nuu rahi na nia i to raua na otia, e no te vî ore te na nunaa Beletita e Holane, aita'tura te nuu Purutia i tomo atu. Ua ite atoa te mau upoo faatere ia Purutia e, e haere atoa hoi te nuu Farani e Paratane na te reira paeau no te paruru i taua na Hau rii ra e no te faaapiapi i te opuaraa a Purutia e na roto mai i reira te aro atoa mai ia Farani e na roto atoa i reira te aro atu ia Paratane.

Ua huru nanea hoi te tama'i na roto i ta Rutia nanao ia Finilane. A pit hoi ava'e te reira tama'i e te vai itoito noa ra te nuu iti Finilane. E eita hoi e ore te haere roa te nanearaa o teie tama'i na te paeau Balkans; oia hoi na roto i te mau basileia nainai Bulutaria ma. Tei reira atoa te fariuraa mana'o o Purutia e o Rutia. Area, o Itaria ra - te faatupu maira ia i te ho amuitahiraa i rotopu ia'na e taua mau nunaa rii ra no te arai i te nanaora opuahia.

Mai teie te mau huru i teie nei

Aita i manuïa ta Purutia tama'i i uta i nia i te fenua - na te moana e na te reva. Ua nehenehe te firaiaa i te reira. Te tiaibia ra te anotau mahanahana; ei reira paha ia e ahuaahu ai te mau huru atoa. Te ati noa ra te na Rutia i te Finilane. Te manuïa ra hoi ta Farani e ta Paratane tahatuara ia Purutia. Tiai maite tatou i te mau huru e tupu, mai te mana'o tiaturu aau anaanatae, mai ta Daladier i orero ra, e mai ta te mau faehau e ani ma ra i to muri e i to te atea.

Ia iteito to muri e to te atea - e na reira atoa to mua e to nia i te reni roraa. Ia amo te huiraatira i te fenua e i ta ratou tufaa hopea, mai te hopea o te tutava e amohia ra e to tatou nuu. Aita to mua roa e to mua e na tamuta ra - eiaha atoa ia to muri e to te atea e mutamuta.

Ei reira e TU ai te itoito, te tiaturi, te anaanatae e te faaupootiara teie atoa tama'i.

RURU

Marcel Bonnet, Gérant

Kenneth R. Stevens, Imprimeur

Uel C. Hunting, Éditeur de la Misi

O. Rudeen Allred, Assistant Éditeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: e 5 farane i te matahiti; e 10 farane no na matahiti e toru.